

醫
酉
然
三
脈
全
書

黃帝鍼灸甲乙經卷十目錄

陰受病發痺

上下

陽受病發風

上下

八虛受病發拘攣

熱在五藏發痿

手太陰陽明太陽少陽脉動發肩背痛肩前臑痛

肩似拔

水漿不消發飲

黃帝鍼灸甲乙經卷十

陰受病發痺第一

上

黃帝問曰周痺之在身者上下移徙隨其脉上下左右相應間不容空願聞此痛在血脉之中耶將在分肉之間乎何以致是其痛之移也間不及下鍼其蓄痛之時間不及定治而痛已止矣何道使然岐伯對曰此衆痺也非周痺也此各在其處更發更止更居更起以左應右以右應左非能周也更發更休刺此者痛雖已止必刺其處勿令復起曰周痺何如曰周痺在於血脉之中

隨脉以上循脉以下不能左右各當其所其痛從上下

者先刺其下以通之

通一作過

後刺其上以脫之其痛從下

上者先刺其上以通之後刺其下以脫之

曰此病安

生因何有名曰風寒濕氣客於分肉之間迫切而爲沫

沫得寒則聚聚則排分肉而分裂分裂則痛痛則神歸

之神歸之則熱熱則痛解痛解則厥厥則他痺發發則

如是此內不在藏而外未發於皮獨居分肉之間真氣

不能周故名曰周痺故刺痺者必先循切其上下之大

經視其虛實及大絡之血結而不通者及虛而脉陷空

者而調之熨而通之其瘕聚者轉引而行之 曰何以
候人之善病痺者少俞對曰粗理而肉不堅者善病痺
欲知其高下視其三部 曰刺有三變何也曰有刺榮
者有刺衛者有刺寒痺之留經者刺營者出血刺衛者
出血刺寒痺者內熱 曰營衛寒痺之爲病奈何曰營
之生病也寒熱少氣血上下行衛之生病也氣血時來
去怫輒賁嚮風寒客於腸胃之中寒痺之爲病也留而
不去時痛而皮不仁 曰刺寒痺內熱奈何曰刺布衣
者用火焯之刺大人者藥熨之方用醇酒二十升蜀椒

一升乾薑一升桂一升凡四物各細咬咀著清酒中綿
絮一斤細白布四丈二尺竝內酒中置酒馬矢煨中善
封塗勿使氣泄五日五夜出布絮暴乾復漬之以盡其
汁每漬必晬其日乃出布絮乾之并用滓與絮布長六
七尺爲六巾卽用之生桑炭炙巾以熨寒痺所乘之處
令熱入至於病所寒復炙巾以熨之三十遍而止卽汗
出炙巾以拭身以三十遍而止起步內中無見風每刺
必熨如此病已失此所謂內熱 曰痺將安生曰風寒
濕三氣合至雜而爲痺其風氣勝者爲行痺寒氣勝者

爲痛痺濕氣勝者爲著痺 曰其有五者何也曰以冬
遇此者爲骨痺以春遇此者爲筋痺以夏遇此者爲脉
痺以至陰遇此者爲肌痺以秋遇此者爲皮痺 曰內
舍五藏六府何氣使然曰五藏皆有合病久而不去者
內舍於合故骨痺不已復感於邪內舍於腎筋痺不已
復感於邪內舍於肝脉脾不已復感於邪內舍於心肌
痺不已復感於邪內舍於脾皮痺不已復感於邪內舍
於肺所謂痺者各於其時感於風寒濕之氣也 諸痺
不已亦益內也其風氣勝者其人易已 曰其時有死

者或疼久者或易已者何也曰其入藏者死其留連筋
骨間者疼久其留連皮膚間者易已 曰其客六府者
何如曰此亦其飲食居處爲其病本也六府各有俞風
寒濕氣中其俞而食飲應之循俞而入各舍其府也

曰以鍼治之奈何曰五藏有俞六府有合循脉之分各
有所發各治其過則病瘳矣 曰營衛之氣亦令人痺
乎曰營者水穀之精氣也和調五藏灑陳六府乃能入
於脉故循脉上下貫五藏絡六府衛者水穀之悍氣也
其氣剽疾滑利不能入於脉也故循皮膚之中分肉之

間熏於肓膜聚

素問作素

於胸腹逆其氣則病順其氣則愈

不與風寒濕氣合故不爲痺也

陰受病發痺

下

黃帝問曰痺或痛或不痛或不仁或寒或熱或燥或濕者其故何也岐伯對曰痛者其寒氣多有寒故痛其不痛不仁者病久入深營衛之行滯經絡時疎故不痛皮膚不營故不仁其寒者陽氣少陰氣多與病相益故爲寒其熱者陽氣多陰氣少病氣勝陽乘陰故爲熱其多寒汗出而濡者此其逢濕勝也其陽氣少陰氣盛兩氣

相感故寒汗出而濡也夫痺在骨則重在脉則凝而不
流在筋則屈而不伸在肉則不仁在皮則寒故具此五
者則不痛凡痺之類逢寒則急逢熱則縱 曰或有一

脉生數十病者或痛或癰或熱或癢或痺或不仁變化
無有窮時其故何也曰此皆邪氣之所生也 曰人有

精氣有正氣有邪氣何謂也曰真氣者所受於天與水
穀氣并而克身者也正氣者正風從一方來非虛風也

太素云非
災風也

邪氣者虛風也虛風之賊傷人也其中人也

深不得自去正風之中人也淺而自去其氣柔弱不能

傷真氣故自去虛邪之中人也悽索動形起毫毛而發

腠理而入深內薄於骨則爲骨痺薄於筋則爲筋攣薄

於脉中則爲血閉而不通則爲癰薄於肉中與衛氣相

薄陽勝則爲熱陰勝則爲寒寒則其氣去去則虛虛則

寒薄於皮膚其氣外發腠理開毫毛搖氣

一本則淫氣

往來

微行則爲癢氣留而不去故爲痺衛氣不去則爲不仁

病在骨骨重不可舉骨髓痠痛寒氣至名曰骨痺深者

刺無傷脉肉爲故其道大小分骨熱病已止病在筋

筋攣節痛不可以行名曰筋痺刺筋上爲故刺分肉間

不可中骨疾起筋熱病已止 病在肌膚肌膚盡痛名
曰肌痺傷於寒濕刺大分小分多發鍼而深之以熱爲
故無傷筋骨筋骨傷寒發若變諸分盡熱病已止
曰人身非衣寒也中非有寒氣也寒從中生者何曰是
人多痺陽氣少而陰氣多故身寒如從水中出 曰人
有身寒湯火不能熱也厚衣不能溫也然不爲凍慄是
爲何病曰是人者素腎氣勝以水爲事太陽氣衰腎脂
枯不長一水不能勝兩火腎者水也而主骨腎不生則
髓不能滿故寒甚至骨所以不能凍慄者肝一陽也心

二陽也腎孤藏也一水不能勝上下火故不能凍慄病

名曰骨痺是人當攣節着痺不去久寒不已爲肝痺一作

骨痺舉節不用而痛汗注煩心取三陰之經補之

厥痺者厥氣上及腹取陰陽之絡視主病者寫陽補

陰經也風痺主病靈樞作淫不可已者足如履冰時如

入湯中肢經淫灤煩心頭痛時嘔時悶眩已汗出久則

目眩悲以喜怒短氣不樂不出三年死足髀不可舉

側而取之在樞闔中以員利鍼大鍼不可膝中痛取

犢鼻以員利鍼鍼發而間之鍼大如釐刺膝無疑

足不仁刺風府 腰已下至足清不仁不可以起坐尻

不舉腰俞主之 痺會陰及太淵消灤照海主之 嗜

臥身體不能動搖大溫一本作濕三陽絡主之 骨痺煩滿

商巨主之 足下熱痛不能久坐濕痺不能行三陰交

主之 膝內廉痛引臑不可屈伸連腹引咽喉痛膝關

主之 痺脛重足跗不收跟痛巨虛下廉主之 脛痛

足緩失履濕痺足下熱不能久立條口主之 脛茗茗

一本作苦痺膝不能屈伸不可以行梁丘主之 膝寒痺不

仁不可屈伸髀關主之 膚痛痿痺外丘主之 膝外

廉痛不可屈伸脛痺不仁陽關主之 髀痺引膝股外

廉痛不仁筋急陽陵泉主之 寒氣在分肉間痛上下

痺不仁中瀆主之 髀樞中痛不可舉以毫鍼寒留之

以月生死爲瘡數立已長鍼亦可 腰脅相引痛急髀

筋癭脛痛不可屈伸痺不仁環跳主之 風寒從足小

指起脉痺上下帶胸脅痛無常處至陰主之 足大指

搏傷下車挫地通背指端傷爲筋痺解谿主之

陽受病發風第二上

黃帝問曰風之傷人也或爲寒熱或爲熱中或爲寒中

或爲厲風或爲偏枯其爲風也其病各異其名不同或

內至五藏六府不知其解願聞其說岐伯對曰風氣藏

於皮膚之間內不得通外不得泄風氣者善行而數變

腠理開則淒

素問作洒

然寒閉不熱而悶其寒也則衰食飲

其熱也則消肌肉使人解

素問作快慄

悶而不能食名曰

寒熱

風氣與陽明入胃循脉而上至目內眥其人肥

則風氣不得外泄則爲熱中而目黃人瘦則外泄而寒

則爲寒中而泣出

風氣與太陽俱入行諸脉俞散分

肉間衛氣悍邪時與衛氣相干

素問無衛氣悍邪時五字

其道不利

故使肌肉臃脹而有瘍衛氣凝而有所不行故其肉有不仁厲者有榮氣熱浮其氣不清故使鼻柱壞而色敗皮膚瘍以潰風寒客於脉而不去名曰厲風或曰寒熱以春甲乙傷於風者爲肝風以夏丙丁傷於風者爲心風以季夏戊己傷於風者爲脾風以秋庚辛傷於風者爲肺風以冬壬癸傷於風者爲腎風風氣中五藏六府之俞亦爲藏府之風各入其門戶風之所中則爲偏風風氣循風府而上則爲腦風入系頭則爲目風眼寒飲酒中風則爲漏風入房汗出中風則爲